

Headlines

1. दक्खनी कश्मीर दे पहलगाम च आतंकवादियें सैलानियें दे इक्क समूह पर गोलियां चलाइयां, कई सैलानी हमले च घायल, प्रधानमंत्री, गृह मंत्री, उपराज्यपाल ते मुख्मन्त्री होरें हमले दी निंदेआ कीती, आखेआ दोषिएं खलाफ सख्त कार्रवाई कीती जाग।
2. केंद्री मंत्री डॉ. जितेंद्र सिंह होरें आखेआ जे रामबन च राहत कम्में च तेजी, बिजली ते पानी दी सप्लाई करने दा कम्म जारी।
3. मुख्मन्त्री उमर अब्दुल्ला होरें हाड़ प्रभावित खेत्तरें च जमीनी स्थिति दी समीक्षा कीती, आखेआ, 24एं घंटें दे अंदर आमदोरफ्त बहाल करना सरकार दी प्राथमिकता।
4. जी.ओ.सी व्हाइट नाइट कोर लेफ्टिनेंट जनरल पी.के मिश्रा होरें पुंछ ते राजौरी सेक्टरें च कम्में-कार्रवाइयें दा जायजा लैता।
5. अज्ज विश्व धरती दिवस मनाया जा'रदा ऐ। आर.एन.यू आकाशवाणी जम्मू नै ध्याड़े गी बूहटे लाइयै मनाया।

<><><><><><>

Pahalgam-Attack

कश्मीर दी मशहूर सैलानी थाहर पहलगाम च आतंकवादिएं सैलानिएं दे इक समूह पर गोलीबारी कीती। इस गोलीबारी च कई लोक घायल होए न। सुरक्षाबलें आसेआ तपाशी अभियान चलाया गेआ ऐ ते होर जानकारी गी अजें बलगेआ जा'रदा ऐ। उपराज्यपाल मनोज सिन्हा होरें इस कायराना हमले दी सख्त लफ्जें च निंदेआ कीती ऐ। उनें आखेआ जे हमले लेई जिम्मेदार लोकें गी बख्शेया नेई जाग। उनें डीजीपी ते सुरक्षा अधिकारिएं कन्नै गल्ल कीती ते सेहत सरबन्धी हमले गी हिदायत कीती जे घायलें गी फौरी मेडिकल सहूलत उपलब्ध करोआई जा। एल.जी होरें घायलें दे तौले नरोए होने दी कामना कीती। मुख्मन्त्री उमर अब्दुल्ला होरें बी इस घटना दी सख्त लफ्जें च निंदेआ कीती। प्रधानमंत्री नरेंद्र मोदी होरें इस घटना बारै गृह मंत्री अमित शाह हुंदे कन्नै फोन पर गल्ल कीती ते उनेंगी घटना आहली थाहर दा दौरा लाने लेई आखेआ। प्रधानमंत्री होरें लोड़चदी कार्रवाई करने दे निर्देश दित्ते। गृह मंत्री होरें इस हमले दी

निंदेआ कीती। गृह मंत्री अमित शाह होरें आखेआ जे ओहू तौले गै श्रीनगर लेई रवाना होडन ते सुरक्षा एजेंसिएं कन्नै जायजा बैठक लाडन।

<><><><><><>

Ramban-Rescue

रामबन च राहत ते बचाऽ कम्म बरोबर जारी ऐ। इलाके च 1 ज्हार 486 ट्रांसफार्मिं गी परतिए बहाल करी दित्ता गेआ ऐ। केंद्री राज्य मंत्री डॉ. जितेंद्र सिंह होरें जानकारी दित्ती जे 1 ज्हार 486 ट्रांसफार्मिं राएं बिजली सप्लाई कीती जा रदी ऐ ते बाकी रौहंदे 286 दा कम्म जारी ऐ। उनें आखेआ जे राश्ट्रीय जरनैली शिडक गी आंशिक तौर पर कल्लै तगर बहाल करी दित्ता जाग। पानी सप्लाई बारै उनें आखेआ जे 98 चा 89 चालू न। मंत्री होरें प्रशासन दे जत्तें दी सराहना कीती।

<><><><><><>

CM-Inspection

मुख्यमंत्री उमर अब्दुल्ला होरें हाडें करी प्रभावित इलाकें ते रामबन तहसील च राश्ट्रीय जरनैली शिडक एन.एच-44 गी परतिए बहाल करने आहले कम्मै दा जायजा लैता। उनें आखेआ जे ट्रैफिक गी 24 घंटे दे अंदर बहाल करना सरकार दी पैहली तरजीह ऐ। अपने दौरे दौरान मुख्यमंत्री होरें मुकामी अधिकारिएं कन्नै बैठक लाई ते जारी राहत ते बचाऽ कम्में दा जायजा लैता। उनें जरूरी सेवाएं गी तौले बहाल करने लेई गलाया। उनें मुकामी लोकें गी भरोसा दोआया जे प्रशासन फौरी मदद लेई पूरी चाल्ली बचनबद्ध ऐ।

<><><><><><>

Salal-Dam Gates

उप्परले पहाड़ी इलाकें च भारी बरखा दे बाद चिनाहू दरेया च पानी दे बधे दे रोहड गी ध्यानै च रखदे होई सलाल डैम मेन गेट एहतियात दे तौरा पर खोले गेदे न जेहडे कारण दरेया च पानी दा स्तर बधै करदा ऐ। रियासी जिला प्रशासन नै आम लोकें गी सलाहू जारी कीती ऐ जे ओ हेठले इलाकें च दरेया दे कंडे कश नेई जान ते ना गै बपने माल बच्छे गी उत्त बक्खी जान देन। प्रशासन उआं पानी दे स्तर दे हालात पर नेडमी तक्क रखा करदा ऐ।

<><><><><><>

Highway-Update

मुगल शिड़क पर दौनें भेठा दा गड़िएं दी आवाजाई जारी ऐ। श्रीनगर-सोनामर्ग-गुमरी शिड़क पर कारगिल ते श्रीनगर आहली भेठा आवा जाई जारी ऐ। सिंथन शिड़क पर यातायात राश्ट्रीय जरनैली शिड़का ते ढांचागत विकास सरबन्धी कार्पोरेशन लिमिटेड आसेआ हरी झंडी थोने मगरा गै बहाल कीता जाग। यात्रिएं गी सलाह दिती गेई ऐ जे ओहू अपनी-अपनी लेन च चलन, नियमें दी पालमा करन, ओवरटेकिंग ते गलत लेन च चलने थवां बचन। ताई, जम्मू-श्रीनगर राश्ट्रीय जरनैली शिड़क अजें बी बंद ऐ ते शिड़का पर यातायात बहाल करने दा कम्म जारी ऐ।

<><><><><><>

GoC Poonch Rajouri

White Kinght Corps (core) दे G.o.C लेफ्टिनेंट जनरल पी.के मिश्रा होरें Ace of Spades ते रोमियो फोर्स दे जी.ओ.सी-एं कन्नै पुंछ ते राजौरी सेक्टरें दा दौरा लाइयै कम्मै-कारवाइयें दा जायजा लैता। दौरा अगेत्रें इलाकें च तैनात सैनिकें दी तयारी दा आंकलन करने पर केंद्रित हा। जवानें कन्नै गल्लबात करदे होई जी.ओ.सी होरें उन्दे उच्च मनोबल, समर्पण ते पेशेवर तरीके कन्नै कम्म करने दी सराहना कीती। उनें जवानें आसेआ शांति ते खित्ते च सुरक्षा सुनिश्चित करने दी बी तरीफ कीती। उनें देश दे बन्नें गी सुरक्षित रखने आस्तै जवानें दे दृढ़ संकल्प ते बचनबद्धता दी बी सराहना कीती।

<><><><><><>

RNU-Jammu Earth-Day

अज्ज दुनिया भरै च विश्व धरती ध्याड़ा मनाया जा'रदा ऐ। इस ध्याड़े दा मकसद पर्यावरण दी राखी दे कन्नोकन्नी मां धरती गी संरक्षित रखना बी ऐ। इस बारे इस ध्याड़े दा विषेसार ऐ "Our powerm our planed" यानि "स्थाड़ी शक्ति, स्थाड़ा ग्रह"। आकाशवाणी दा क्षेत्रीय समाचार एकांश जम्मू नै बी अज्ज विश्व धरती दिवस पूरी निश्ठा ते समर्पण भाव कन्नै मनाया। अज्ज आरएनयू हैड सनें एकांश दे सारे कर्मचारी धरती दे रंग दे प्रतीक नीले टल्ले लाइयै दफ्तर आए। अज्ज बडलै इस मौके आरएनयू हैड गुलशन रैणा होरें मलाजमें गी अपनी धरता माता दे संरक्षण लेई पूरी चाल्ली रमानदारी कन्नै योगदान देने दी सगंध बी चुकाई। उनें सब्बने कर्मचारिएं गी

बूहटे बी भेंट कीते ते आखेआ जे अपने घरें च एहू बूहटे भलेया कुसै सामनै लाओ जिसी दिक्खी दिक्खियै असें प्रेरणा थ्हांदी रवै।

<><><><><><>

Handicrafts-Awards

कपड़ा मंत्रालय दे अंतर्गत दस्तकारी दे विकास सरबंधी डिवेलपमेंट कमिशनर हुंदे दफ्तर नै प्रतिष्ठित राश्ट्री दस्तकारी पुरस्कार 2024 आस्तै दरखास्तां मंगियां गेइयां न। 30 बरे या ओहदे कोला बद्द उम्मी आहले ते 10 बरे दा तजुर्बा रखने आहले दस्तकार राश्ट्री पुरस्कार आस्तै आवेदन करी सकदे न। 50 बरें या ओहदे कोला बद्द उम्मी आहले ते 20एं बरें दा तजुर्बा रखने आहले दस्तकार शिल्प गुरू पुरस्कारें लेई योग्य मन्नै जाडन। कुल 25 पुरस्कार दित्ते जाडन जिंदे च बद्द कोला बद्द 6 पुरस्कार शिल्प गुरू श्रेणी च दित्ते जाडन जदके 19 पुरस्कार राश्ट्री पुरस्कार श्रेणी च दित्ते जाडन। पुरस्कारें आस्तै दरखास्तां देने दी अखीरी तरीक 12 मई 2025 ऐ। इच्छुक दस्तकार Handicrafts Service Centre, अखनूर रोड जम्मू कन्नै संपर्क करी सकदे न जां फी वेबसाइट www.handicrafts.gov.in परा होर जानकारी लेई सकदे न।

<><><><><><>

Kishtwar-Accident Fund

राहत प्रदान करने दी इक्क बड्डी कोशिश दे तैहत डिप्टी कमिशनर किशतवाड़ राजेश कुमार शवन होरें 15 लक्ख रपे दी राहत राशि बंडी ऐ। एहू राहत राशि जम्मू-कश्मीर रोड एक्सीडेंट विक्टिम फंड तैहत बंडी गेई ऐ। शिड़क हादसें च अपनी जान मुहाने आहले 15 जनें दे परोआरें गी 1-1 लक्ख रपे दी रकम बतौर मुआवजा दित्ती गेई। एहू कार्यक्रम डी.सी दफ्तर च आयोजित कीता गेआ ते एहदे च किशतवाड़ दे अडिशनल डी.सी पवन कोतवाल सने कई होर अधिकारी बी शामिल होए। जिला प्रशासन नै यकीन दोआया ऐ जे ओहू अगगे बी शिड़क हादसें कन्नै प्रभावित परोआरें गी आर्थिक मदाद मुहैया करोआंदी रौहग ते उं'दी मुश्किलें आहली घडी च उंदा साथ दिंदी रौहग।

<><><><><><>